



منى علام

شاعرة عامية وموظفة بنك سابقا،
ولي ديوان حاليا باسم "دموع
حورية" والديوان الثاني جاهز على
الطبع "كلام أخرس"

بل الحب

أنا كان نفسي

- وبصوت عالي - نفسي أقولك:
إن أنا ممكن أعيش من غيرك
قلبي دا مش متحمل ظلمك
نبضي دا عمره ما يبقى أسيرك
حتى الحلم اللي حلمتوك
دايما كاشف ف خطوط سيرك
يعني أنا روجي بجد أكيد
مش محتاجة خلاص تفسيرك
كنت الدنيا ف ضي عيوني
لكن بعدك غير لوني

شفت الليل العتمة ف كوني
شفت الحب كانه كابوس
لأ.. وكإنك جني فانوس
فجأة بيظهر..
فاكر قلبي بيه ملبوس
لكن مرة ما قالها لقلبي
تحت أوامرك أو شبك
ابعد عني أرجوك وانساني
وسيبني راح أقرا الرقية عليك
سيبني أحصن نفسي بنفسي
أدفن ألمي وأدفن يآسي
أدفن أحلام إتمنيتهها
معاك أو ليك
كنت أتمنى تمد إديك
تمسح دمعة ماشية ف خدي
نفسى أشوفك ليلي الوردى
أفرد كل جناحي عليك
لما تقرب تروي ف أرضي
لكن سبت الأرض جفاف

سبت القلب معاك متعلق
على باب هجر بكام خطاف
وبقيت تخنق فرحتي فيا
وبتدبحني كمان ما تخاف
وبتستطعم دمي ف إيدك
ما هو كان حبي مالي وريدك
وكتير قلت ف قلبي دا سيدك
وانك ليا ملاكي وعبدي
لكن فجأة بتعشق سهدي
سايب دمعي جوه عنية
سايب قلبي وحيد ف الدنيا
وبقيت تمشي عليه وتعدي
لا يا حبيبي مش راح ترجع
يوم تلاقيني ولا حتشوفني
وحدك راح حتعيش ف حكايتي
وده كان آخر حبي أنا ليك
إقرا رسالتي.. قبل الحب
أنا عندي كرامتي